




1000-1000


2/5

R. G. G. G.










82 O.K.


~~B485688~~


Comptroller

M. 13. 543









168  
LA

# CONTREPOISON

CONTRE LES ARTIFI-  
CES ET INVENTIONS DES POLITI-  
ques & autres ennemis de la reli-  
gion Catholique.

*Remply d'infinis beaux passages des escritures à l'e-  
rudition & aduancement de tout bon Catholique.*

Avec le nombre des villes associees;  
Euesques, Iusticiers, & Officiers  
de ce Royaume.



A PARIS,

Pour Anthoine le Riche, rue Saint  
Iacques, pres le Soleil d'or.

1589.

*Avec permission.*

CONTRAPOISON

CONTRE LES ARTIF

Car ET INVENTIONS DES SOLID


F. OUTS & autres ennemis de la reli

gion Catholique.

39

328. Remy l'impie pour peigner des cheveux de  
l'impie & autres ennemis de la religion Catholique.

1589. Avec le nom des villes, des  
Evêques, Prêtres, & Officiers  
de la Religion.



A PARIS,

Pour Antoine le Richer, me  
sacres pres le Soleil d'or.

1780.

Imprimé



CONTREPOISON CON-  
TRE LES ARTIFICES ET INVENTIONS  
*des politiques & autres ennemis de la  
religion Catholique.*



'Experience nous enseigne, que la vertu reluit & fait estinceler les rais de sa splendeur, principalement en aduersité, estant ceste rencontre telle, que pour emporter le dessus il est besoin qu'elle bande ses nerfs, & se face paroistre victorieuse: que s'elle n'est prouoquee, elle demeure recluse, oisue, sans los, & sans honneur: ce qui luy est trop plus grief, que toutes les fatigues, & trauerses, qui se pourroient presenter au demenement de plus importantes affaires, & hazardeuses occurrences. pour cela Scipion se sentoit heureux de ce qu'il deuoit estre le debellateur de ceste belliqueuse & presque inuincible Carthage: & les Romains ne vouloient entierement extirper leurs ennemis, a fin d'auoir à qui bailler preuue de leur valeur: les experts Pilots mōstrent leur industrie & dexterité parmy les tourmentes, tempestes, bourasques, grains, tourbillōs, orages, basses, escueils, rochers, & autres dangers qui se rencontrent en ce grand abyssme des eaux: semblablement vn Capitaine braue & vaillant se fait cognoistre à l'ennemy en temps de guerre,



maintenant à force ouuerte, tantost par ambuscade & surprinse : maintenant attaquant brusquement l'escarmouche, tantost faisant vne feinte retraitte, & par mil autres ruses, comme nous en auons l'exemple en ce grād Capitaine, voire le plus grand, le plus genereux & accomply en toute vertu, que la France nous ait nourry depuis long temps, feu mōseigneur le Duc de Guyse, assassiné traîtreusement, & meschamment à Blois, au Cabinet de celui qui se disoit roy tres-chrestien. Non que pour s'estre comporté trop franchement à seruir ce tyran, & trop vaillamment à mettre en route les ennemys de l'Eglise & de la France, spécialement en ceste derniere guerre contre les Allemans, lesquels par grace diuine il a deffaicts & desconfits: ne leur faisant escorte que de trop pres, depuis la Lorraine iusques en la Beaussé: Tantost les acculant, tantost les battant en queue: plus les escarmouchant sur les ailes, & les guerroiât cōme il iugeoit estre expediēt, plus par vne vaillâce, & adresse admirable, que par force: n'ayāt qu'vne poignée de gens, contre quarante mille ou enuiron. Desquelz touteffois il n'en fust eschappé pas vng, pour porter les nouuelles dela le Rhin, si le tyran avec ce beau Duc d'Epéron, ne leur eussent baillé sauf-conduict (comme c'estoit la raison, veu qu'il les auoit faict venir) en quoy comme vous voyez la perfidie de ce tiran enuers sa propre patrie, vous iugez aussi consequemment l'incomparable valeur de ce bon prince de Lorraine, la louāge duquel demeurera tousiours, voire mesme du cōsentement & aueu, de ceux qui se luy sont faicts ennemys, les calomnies desquels seroient

dementiës par les effectz, ausquelz nous nous deb-  
uons arrester, comme à vn tesmoinage infallible de  
sa vertu, & innocence tout ensemble. Pour dõc re-  
uenir à nostre propos, la perfidie & cruauté de no-  
stre tyran, ceste bombante & fiere armee d'Allemãs  
ont apporté l'occasion d'une couronne immortelle  
à ce valeureux Prince: & à nous la guerre qui se mei-  
ne contre nostre Eglise & patrie par les heretiques,  
par le tyran, par noz faux Freres, ne nous fera elle  
point vne occasion de nous roidir, resoudre, & li-  
guer saintement? Il est desormais temps de faire  
paroistre ce q nous portons en nostre cœur: ce sont  
les scandales ( comme parle l'Apostre) qui sont la  
pierre de touche, pour esprouuer ce que nous auõs  
au dedans: c'est à ceste heure qu'il fault espouser l'un  
ou l'autre party, qu'il fault s'uyre Dieu ou le dia-  
ble: ie ne doute point que iusques à ceste heure, la  
bonne volonté de plusieurs n'aye esté retenue par  
vne crainte veritablement excusable, n'entran-  
sant point si auant en la consciëce de nostre tyran, & in-  
terpretãs en bien ses hypocrisies & bigoteries, com-  
me ainsi est que les vrais François honorent leur  
Prince, & (qui est vn abus introduict par le diable)  
en estoient tantost deuenus idolatres: mais mainte-  
nant apres vne si insigne perfidie contre Dieu & ses  
seruiteurs, ie croy que chacun luy ruera la pierre, &  
que comme il nous pensoit accabler tout à coup, &  
installer l'heretique, luy mesme sera honteusement  
chassé, & sentira sa trahison plus pernicieuse à luy  
mesme, qu'à nous: combien que ie ne scaurois nier  
que nous n'ayons enduré vn horrible escrou par

l'assassinat de ces deux illustrissimes Princes, si est-ce q̄ Dieu eternal (comme vous voyez) en sçait tirer vn tresgrand bien: car quant aux Princes, l'iniure de cetyran leur a causé plus d'honneur, que n'eust fait sa grace & faueur: & quant à nous autres Catholiques, ne voyons nous pas maintenant tout à descouuert, comme petit à petit il sapoit l'Eglise, & corrompoit les vns & les autres de tous estats, & dehors, & dedans le Royaume, tellement qu'il nous eust accablez, deuant qu'eussions eu loisir de penser à nous deffendre en nostre religion? Nous pouuons bien dire avec vn Athenien, nous estions perduz, si nous n'eussions esté perdus: ou plustost pour parler chrestienement, & recognoistre possible le iugement de Dieu, qui ne veut pas qu'on mette son esperance au bras d'vn Prince, il nous a puny, & tout ensemble a eu pitié de nous, prenant à soy ces deux grands Princes pour les rendre bien heureux au ciel, & tandis faisant prosperer noz affaires, par la bonne conduite de ceux, qu'il luy a pleu nous reseruer, dont nous pouuons dire avec le Royal Prophete ps. 59. *Iraus es nobis, & misertus es nobis*, c'est à dire: Seigneur, vous vous estes courroucé contre nous, & avez eu pitié de nous, & toy (tyrā) ose tu dresser tes conseils contre Dieu? tu ratiocinois en Machiaueliste, & ne iettois l'œil que sur la cause seconde: Mais nous autres Catholiques auōs appris vne autre leçon: nous recognoissons la valeur, & honorons la memoire des Princes meürtris, cōme des chefs, & autheurs d'vne si sainte entreprise, & desquels Dieu se seruoit en sa cause, en laquelle ils ont tresbien besongné, nous leuons aussi les yeux



encores plus haut, & les guydons iusques à la cause premiere, Dieu eternal, qui comme il nous les auoit suscité, il n'a la main abbregee, pour nous en pouruoir d'autres (comme il fait) ou par vn moyé à nous inopiné, renuerfer tous les pernicieux desseins, trames, & menees faites contre sa sainte Eglise, laquelle malgré la tyrannie & hypocrisie, durera iusques à la consommation du monde, voire en ce Royaume de France. Gar douter qu'elle ne doibue durer, sinon icy, pour le moins ailleurs, comme grace à Dieu, elle florit tresbien es Indes, ce seroit vne pure heresie, veu les expresses promesses que nous en auons de Dieu, en l'escriture sacree: Or d'autant que plusieurs pourroient vaciller en cest affaire, qui n'importe de moins, que de salut ou damnation de nos ames, soit pour estre trop auant plongees es affaires de ce monde & y adherer, soit pour estre mal instruits, & catechisez en la foy, & religiô, ou pour estre offusquez de passions: ou pour estre aueuglez par l'artifice de Satan & de ses suppots: ou pour se sentir offencez, & scandalisez, voyans quelques vns de noz prelats, faire faux-bon à l'Eglise: ou pour irresolution en si grands troubles, lesquels à la verité pourroient renuerfer sans dessus-dessous, les esprits moins confirmez en la grace de Dieu, ie me suis senty esmeu d'une affection saintement humaine, & d'un soing charitable de mes freres Chrestiens, à tous lesquels ie ne desire pouuoir faire autre bien, qu'eschauffer leurs courages afin de fermement adherer à Dieu, & bien ardamment embrasser son party, nonobstant les difficultez qui se pouroiēt presenter: toutes lesquelles nous ouurent le chemin

de Paradis, plus q̄ ne feroit vne paix grasse, & mollē  
 oisiveté: ce qu'entendent tresbien les bons Catho-  
 liques & esleuz de Dieu, qui ont l'assistance de son  
 saint esprit; qui ont ceste onction, laquelle nous  
 dresse & guide parmy les trauerses, & encombriers  
 d'icy bas, qui se rendent faciles, traitables & prôpts  
 à receuoir les suggestiōs interieures du saint Esprit,  
 qui se lancēt entre les bras du pere celeste, desquels  
 parle Dauid au Ps. 59. *Dedisti metuentibus te significa-*  
*tionem ut fugiant à facie arcus, ut libernetur dilecti tui,*  
 ô Seigneur, vous vōus entēdez bien avec les vostres:  
 vous avez baillé le signe à ceux qui vous craignent;  
 afin qu'ils eurent le traitt de vostre arc qui est ten-  
 du, & que vos bien-aynez soient garentiz: quant  
 aux meschans, il me semble que l'entens leurs mau-  
 greemens, blasphemés, execrations, impatience  
 contre Dieu & les hommes: gens tellement abbruti-  
 z, & despouillez de toute humanité, que ny l'hon-  
 neur de Dieu, ny la religion, ny la patrie, ny la poste-  
 rité, ny consideration quelconque, les scauroit faire  
 demordre de ce qui est de leur commodité tempo-  
 relle, & particuliere. Or ie sçay bien que lauer la te-  
 ste à tels asnes, ce seroit perdre la lessive, partant ie  
 m'adresse aux gens de bien: Et en premier lieu ie les  
 prie considerer l'importance de l'affaire qui se re-  
 mue auourd'huy, c'est la religiō, c'est le culte diuin,  
 c'est la foy Catholique, laquelle nous auons signée,  
 bullee & ratiffiee du sang précieux de nostre Sau-  
 ueur & Redempteur Iesus Christ, d'vne façon plus  
 singuliere, plus recommandable, & plus preuilegee,  
 que les tables de la loy escriptes du doigt de Dieu;  
 n'ont esté donnees aux enfans d'Israel, par ce grand  
 Legislateur

Legislateur Moyse: nous l'auons dictée & promul-  
 guée de sa propre bouche, confirmée par les Apo-  
 stres, arrousee du sang des Martyrs, & aueree par in-  
 finis miracles, tellement que nous nous pouuons  
 iustement glorifier, & nous attribuer ce qui est es-  
 crit au Deuter. chap. 4. *Non est natio tam grandis, quæ  
 habeat deos appropinquantes sibi, sicut Deus noster adest cun-  
 ctis obsecrationibus nostris: quæ est enim gens sic inclita, &  
 habeat ceremonias, iustaque iudicia & vniuersam legem?*  
 C'est à dire, il n'y a nation si grande qui ait tant de  
 priuauté avec son Dieu, comme nostre Dieu est  
 prest en toutes noz prieres: qui est la gent si noble,  
 qui ait si belles ceremonies, si iustes iugemens, &  
 vne loy si vniuerselle & Catholique? & au mesme  
 chap. apres la continuation de semblables propos,  
 il est dit: *ne obliuiscaris pacti domini Dei tui, quia Dominus  
 Deus tuus ignis consumens est, Deus amulator,* garde toy  
 bien d'oublier le pact du Seigneur ton Dieu, car il  
 est comme vn feu consumant & ialoux, c'est à dire,  
 vengeur des preuaricateurs & contempteurs de sa  
 religion, non que nostre obeissance à ses saincts cõ-  
 mandemens accomble son los, ou que nostre pre-  
 uarication endommage son honneur, mais la vie,  
 ou la mort éternelle, selon sa diuine misericorde, ou  
 iustice nous en reuient: & luy, qui est createur de l'v-  
 niuers; & autheur de la nature, nous fait naistre de  
 telle condition, que menans nostre pauvre vie pas-  
 sagerie icy bas, sous vne sainte religion, telle qu'il  
 nous l'a baillee, nous operiõs nostre salut, en crainte  
 & treueur, sans trop auât nous profunder en ses iu-  
 gemés incõprehensibles, & le controoller, demãdans  
 pourquoy il ne nous a pas creez en gloire, & rendus



heureux dès l'instant de nostre creation, ce qui ne se  
 scauroit dire sans blasphemé & impieté: bien pou-  
 uons nous aspirer & soupirer à nostre celeste pa-  
 trie, iettans l'œil piteux, passionné & ruisselant de  
 larmes d'amour, & de charité vers Dieu nostre pere,  
 & affermissans nostre foy contre les apprehensions,  
 qui nous tirassent, tressaillans d'une sainte impa-  
 tience modérée d'une reuerence enuers nostre Crea-  
 teur, nous pouuons bien dire avec ce bõ Roy Eze-  
 chias en son Cantique: *Domine vimpator*, hélas Sei-  
 gneur ie me sens violenté, ma foy vacille, ou comme  
 ce Centenier en saint Marc 9. *Adiuua domine incre-*  
*ditatorem meam*, aydez seigneur, mon incredulité. Tel-  
 les affections bien modifiées, ne sont que saintes,  
 chassent bien arriere de nous toute presomption,  
 engendrent en nous vne conscience de nostre im-  
 firmité, & nous font plus fermement adherer à Dieu,  
 mais gardons nous d'impieeté, peché detestable,  
 qui bat directement contre Dieu, & conséquement  
 contre la religion, laquelle nous tenõs de luy, pour  
 assurance, & stipulation de nostre salut, si nous  
 nous y comportons Chrestienement. Voyla l'im-  
 portance de nostre religion, à laquelle on en veut  
 auourd'huy: pour donc reuenir à noz Catholiques  
 morfondus, Catholiques par benefices d'inventaire,  
 Catholiques à tous vents, pensent ils estre d'icy  
 bas? pensent ils icy auoir vne cité permanente? ont  
 ils renoncé à leur patrimoine celeste? ont ils si es-  
 troictement espousé leurs maisons & heritages?  
 n'attendent ils heriter autre chose, apres leur trespas  
 que le cercueil & les vers? que fils sont Catholiques  
 tels qu'ils se disent, il faut chager de poil & appren-

dre yne autre leçon: & si trop de prosperité nous a engendré telle faitardise, il est temps de reuenir à nous, & penser que nostre principal affaire en ce monde, est sauuer nostre ame: partant parmy nos negoces terriennes deuons ietter les yeux de nostre cœur vers Dieu, tellement qu'entre toutes nos resolutions, celle cy soit la premiere de quicter toute chose, renoncer à peres, meres, enfans, richesses, & commoditez quelconques, pour suivre Dieu: Hé ie vous demande que sert il a l'homme gagner tout le monde, sil perd son ame: ou quel eschange scauroit il bailler pour icelle cōme parle l'escriture? Ce sont choses perissables & transitoires, lesquelles, si elles euitēt la main du brigand, peuuent perir par le feu, ou par l'eau, ou par ruine, ou (comme dit saint Augustin) *quod non capit Christus, rapit fiscus*: que si nos affaires vont bien pour vn temps, & qu'ayōs amassé des biens, lors que nous en penserons iouyr, nous sera dict comme à ce Richard de l'Euangile: Misérable ton ame te sera redemandee ceste nuit, les biens que tu as acquis, à qui seront ils? prenez en cecy le conseil du Ps. *Dirige si affluant, nolite cor apponere*, si vous auez des richesses n'y mettez point vostre cœur tellement que vous oubliez Dieu, qui les vous a baillées & peut oster: hélas quels biens, qui nous feroient perdre le plus grand de tous les biens, que peussions esperer! hélas quels biés, par l'appast desquels nous renoncerions à la mesme bonté! hélas quels biens, desquels pretendans trop auidentement iouyr, nous couperions broche à l'influēce & source de toute bonté! O biens trompeurs, & qui n'ont rien de vray bien, qu'vne vaine apparence, sous l'ess-

elauage desquels, viuent la pluspart de nos Catho-  
 liques du iourd'huy, n'estans retenuz d'autre bri-  
 de, que de craincte de s'en veoir deposseder, ne res-  
 pirans rien, que terrestre, colloquans leurs affectiōs  
 en choses caducques, & abusans des dons de leur es-  
 prit, & des graces celestes à choses si viles & abie-  
 ctes, mesurant toutes choses selon le present, telle-  
 ment charmez & auenglez, qu'il est impossible de  
 les ramener à raison. Je vous prie remarquer icy l'ar-  
 tifice du diable, par la suggestion duquel nous som-  
 mes si tenans & auares pour la cause de Dieu, & tã-  
 dis nous prodiguons tout, pour fournir à nos excès  
 & desbauches, à nos pompes & luxes, à nos bâquets  
 & autres vanitez, voire mesme à noz impietez, & ido-  
 latrerie: comme nous lisons en l'escriture sainte,  
 que les enfans d'Israël pour forger & façonner vn  
 veau d'or, baillerent tous leurs ioyaux: & comme  
 nous trouuons en l'histoire prophane, que les ma-  
 trones Romaines n'espargnerent point ce qu'elles  
 auoient de precieux à le iecter dans vn gouffre, qui  
 s'estoit ouuert au mitan de leur ville, le pensans ain-  
 si combler, comme frauduleusement leur auoir res-  
 pondu leur oracle: & nous qui auons assurance de  
 nostre Createur, de receuoir le centuple, sommes en-  
 cores retifs! Voyla comme le diable iouë ses jeux,  
 voila nostre ingratitude enuers celui, de la liberali-  
 té duquel, nous auons nostre tout: dessillons de-  
 sormais nos yeux, & nous despignons de ce vilain  
 peché, qui a en soy vne deformité particuliere ou-  
 tre les autres, dont il est rendu odieux à Dieu, & aux  
 hommes, chassons ceste craincte seruile de perdre,  
 & nous armons d'vne sainte generosité, thesauri-



sons au Ciel, vsurons à Dieu, qui est plus que trop iuste, & trop puissant, pour nous rendre nostre de-  
 post, ainsi que nos biens nous soient les moyens de  
 gagner la vie eternelle, non point les instrumens,  
 pour nous enuoyer aux flammes d'enfer. Or sus ie  
 ne doute point que maints ne se doiuent rendre  
 exorables, ayans le tout fondé de bié pres: mais ius-  
 ques à present ils pretendront cause d'ignorance,  
 & alleguerot qu'ils ont ouy dire qu'il faut viure se-  
 lon le temps, qu'il se faut accommoder, qu'il faut  
 complaire à son Prince en tout, que Dieu ne nous  
 veut pas si cher vendre son Paradis: autres deman-  
 dent s'il y en a: autres pensent que Dieu disposera de  
 son Eglise, & quant à eux, ils entendent à leurs affai-  
 res: autres pensent que hazarder sa vie, & ses biens  
 pour l'honneur de Dieu, est vne supererogation,  
 vn conseil, vne perfection de vie Apostolique, à la-  
 quelle ils n'aspirent point, & autres semblables rai-  
 sons friuolles, & illusoires, lesquelles pour renuer-  
 ser toutes d'un coup, obmettant infinis passages de  
 l'escriture sainte, ie leur mettray deuant les yeux  
 le dernier & principal des commandemens de Dieu,  
 que tous Chrestiens doiuent apprendre, reciter, &  
 obseruer, asçauoir: Tu aymeras le Seigneur tō Dieu,  
 de tout ton cœur, de toute ton ame, de toute ta for-  
 ce, & de tout ton entendement. Et bien à vostre ad-  
 uis, ce commandement n'est il pas clair, appellerez  
 vous aimer en la façon predite, si vous permetez  
 que son honneur soit honny & violé, si vous tolle-  
 rez l'oppression & defloration de l'Eglise son es-  
 pouse? La deprauatiō de ce siecle, & les propositiōs  
 de cest athee Machiauel, Euangeliste des politiques

du iourd'huy, vous ont elles peu faire oublier les commandemens du Dieu viuant, lesquels doiuent estre engrauez & burrinez au plus profond d'un cœur vrayement Chrestien: auez vous pas eu tât de bons predicateurs, sainctement zelez & assistez de l'esprit de Dieu? mais vous ne les auez pas creu, cōme Dieu eternal se plaint en Ezech. chap. 33. *Sedent coram te populus meus & audiunt sermones tuos, & non faciunt eos, quia in canticum oris sui vertunt illos*, & vn peu apres, *cū euenerit quod predictū est, ecce enim venit, tunc sciēt quod Prophetes fuit inter eos*. Et comme iadis les Troyens ne croyoient point à leur Cassandre, qui ne leur prophetizoit que trop vray, le sac & ruine de leur ville, ie diray à ceux qui se plaignent d'instruction, ce que dit le Psalmiste, *noluit intelligere ut bene ageret*, il n'y a si mauuais sourd que qui ne veut pas escouter, ce n'est pas ainsi qu'il faut traicter avec dieu, scrutateur de nos cœurs, iuge de nos pensees, & inspecteur de nos deportemens, qui nous condamnera par nous mesmes, d'autant avec plus grande confusion, que nous aurons voulu vser de ruse & fauultise enuers luy: la simplicité est trop loing bannie de nostre siecle, pour faire penser que quelqu'vns maquassent à leur deuoir, faute d'estre instruits & catechisez: & en vn mot, ce mot de religion sera il en moindre reuerence enuers nous, qu'enuers les huguenots, desquels la pluspart malicieusement & cōtre sa propre conscience fait manteau, & pretexte d'icelle, & consequemment hazarde, sa vie & ses moyens, comme font les voleurs pour le pillage & butin? Le mal vient d'ailleurs: ce sont nos mauuaises passions, pestes de nos ames, qui gastent tout & ren-



uersent l'ordre, la verité & la solidité de la religion: laquelle requiert que nous prestions grande creance à la toute puissance, & bonté de nostre Dieu, que nous tremblions par reuerence & crainte à la souuenance d'icelle, que nous captiuions nos sens, & bridions la legereté de nostre esprit, que nous attendions l'effect de sa saincte volonté en silence, que nous nous comportions deuant les yeux de sa maiesté en tresprofunde humilité, ie recognoissant celuy, qui a en sa main nostre vie & nostre mort: & tandis nous faisons estrier de la religion: de quelque part que nous nous voulions renger, nous en faisons couuerture: nous nous laissons emporter à la violence & impetuosité de nos passions: l'un dit, ie suis vassal d'un tel seigneur: l'autre dira, ie suis son domestique: l'autre alleguera que ses deuâciers ont esté seruiteurs de la maison: autres plus cauts regardent le succes & preuoient l'auenir: autres se laissent gagner par faueur & courtoisie: ce qu'a bien sceu cognoistre & practiquer le Roy de Nauarre, lequel comme il est homme d'assez belle deffaicte, mondainement courtois & fort caut en toutes sinistres entreprises deuant que dernièrement les armes fussent leuees couroit parmy ceste Guyenne, tout en chassant & alloit prendre ors le disner, ors le souper es chasteaux des Gentils-hommes & Seigneurs du pays, puis par quelque propos gracieux, leur mettant la main sur l'espaule par priuauté, & se faisant accortement compagnon à chacun, les gaignoit & attiroit à son party: tant peu ils estoient resolz, & fermes Catholicques, autres disent qu'ils sont Catholicques, mais que leurs espees trenchét pour

les huguenots, autres sont mal contans, autres sont  
 & qui plus: mais toute ceste canaille ne sçait que c'est  
 de vraye religion, ny de seruir Dieu: & quelque beau  
 semblant qu'ils fassent, ie croy qu'ils n'ont autre  
 Dieu que leur folle volonté & fantasie. Ie demande-  
 rois volontiers à tels Protees & Cameleons, quel  
 Dieu ils croient: fils respondent, Createur du ciel,  
 & de la terre, tout-puissant, punisseur des meschans  
 & remunerateur des bons: n'est-ce pas vn peché cō-  
 tre son saint Esprit, le contemner tel, & tantost  
 iuyure, tantost abandonner son party selon diuerse  
 occurrence? & fils croient que nostre religion soit  
 fondee sur la pierre angulaire nostre Sauueur, &  
 Redempteur, arrousee de son sang, conduite par le  
 saint Esprit, quel peché sera-ce preuariquer d'icel-  
 le, pour iuyure nos vollages affectiōs? quelle excu-  
 se pourrons nous pretendre de nostre inconstance,  
 en chose de telle importāce? & y a vne chose en cé-  
 cy que ie desplore principalement, c'est que nostre  
 noblesse, pour la pluspart, en est frappee à ce coing,  
 & prēd party plus par passiō, que par electiō: laquel-  
 le faulte tout d'vn cōup rait le los qu'ils pour-  
 roient pretendre pour leur vaillance & adresse, &  
 pour ceste honorable & glorieuse mort en champ  
 de bataille: car ny telle vaillance, ny telle mort, ne  
 sont recommandables que pour la iustice de la que-  
 relle, veu que les brigands & voleurs sont adroictz  
 & vaillans, & le plus souuent meurent les armes au  
 poing, chose veritablement desplorable, qu'vn mal  
 volontaire, si penible & laborieux, soit sallarié d'vn  
 autre mal trop plus cuyfant: gaigner & acquerir à  
 pointe de lance, au lieu de l'os, vne confusion: au  
 lieu

lieu de lauriers, les flammes eternelles. Je vous prie retourner voz cazacques & vous rengez sous le guidon de la croix: ne perdez point vostre courage masse & viril: mais changez le: soyez les cheualiers de Dieu, non pas du diable, & puis que l'ambition se loge volontiers és cœurs les plus nobles & genereux, donnez & vouez vostre seruice à ce grand Seigneur des seigneurs, qui fait regner les Roys, & quand il luy plaist, en sçait bien faire la depesche: qui vous guerdonnera de la couronne d'immortalité, & vous fera tous Roys, car le seruir c'est regner. Que si vous ne regardez que sur le Prince mortel, hélas, ie vous plains, voyant voz fatigues, dangers, mesaise, & bien souuent la mort qui vous precipite en vne autre mort eternelle. Quel bié ou heur pouuez vous attendre de celuy, qui est indigent & souffreteux deuant Dieu, aussi bien que vous? & ie vous diray d'auantage, duquel là condition est plus hazardeuse, & iournaliere, que d'aucun de vous? qu'ainsi ne soit, voyez vous pas où nous en sommes aujourd'huy, par nostre mauuais mesnage: mais principalement par les passiōs desfreiglees de ie ne sçay quels estourdis, esceruelez & melchants fols, qui pour assouuir leur rage, & maltalent ont mesprisé Dieu & la religion? Or est il que tous ne sont pas tant subiects à leurs passiōs, mais ont le naturel plus lasche, & remis: Partant l'ennemy du genre humain, a suscité hypocrites, & faux freres, qui feignans d'estre bōs Catholiques, auanceront quelques propos ambigus, & sonderont le guet: que s'ils rencōtrent quelqu'un vacillant, & irresolu, ils battent le fer, & avec autant de vehemence qu'il leur est possible, l'atti-



rent à leur cordelle: tantost diront que Dieu est iuste, & qu'il mesure les hommes de mesme mesure qu'ils ont mesuré les autres: qu'en grandes affaires, c'est le meilleur d'abreger, & vser d'expediant: que ce n'est à nous affaire à controller nostre Prince: qu'il a esté prouocqué & irrité: O supposts du diable, ennemis de Dieu, & del'Eglise! vous voulez dōc dire, que Coligny & ceux de sa faction, ont esté iniustement tuez: vous regrettez donc que ce brigād a esté preuenü, & n'a eu loisir de ruiner de fond en comble, ceste pauvre France, en laquelle se voient auiourd'huy tant d'Eglises & monasteres abbatus pour vestiges de sa meschanceté & hostilité: vous blasphemez Dieu, luy imputans vne si execrable iniustice, & malgré vous, vous condānez vostre tyran qui est meurtrier de tous les deux: vous abrogez donc & peruertissez toutes les saintes loix, & nous ramenez à vne vie barbaresque de Scithe, ou de Gelons: Les grandes affaires, sont-ce pas celles esquelles il faut proceder avec plus grāde iustice & equité? Vous voulez dōc establir vn Herodes, ou vn Neron, non pas vn Roy Chrestien: vous prenez donc pour occasion de meurtrir & assassiner vne iuste & sainte sollicitation, a l'effet de laquelle le deuoir l'oblige. Il fait semblant de la trouuer bonne, il l'auctorise, la signe, la iure, & reiore avec les plus grandes execrations qui se puissent excogiter, en fin denigrant Dieu & les hommes, il commet cest enorme assassinat des bons Princes, & vne telle perfidie enuers l'assemblee generale des Estats de France. O artifice de Satan, qui sçait pallier les plus execrables forfaits de quelque iuste pretexte, & apparence! Il

vse encor d'une autre ruse, il enuoye des forgeurs de  
 nouvelle qui disent tantost que le tyran a dix, dou-  
 ze, quinze mille hommes, & il n'en a pas quatre mil-  
 le, & i'espere que ceux la mesmes, luy feront vn  
 mauuais tour: que les Allemants descendent, que  
 les Anglois trauerfent la mer, qu'il veut bailler en  
 pillage certaines villes, entre autres Paris, & Orleãs:  
 qu'il a des intelligences és villes Catholiques &  
 autres impostures, & bourdes qui ne meritēt point  
 de replicque, sinon que tout à plat nous despitons  
 le diable, le tyran, & ses suposts par vne ferme con-  
 fiance en Dieu qui nous aydera, deliurera, & baille-  
 ra moyen de venger l'iniure faite à son Eglise: que si  
 mal nous aduenoit, ce seroit en punition de nostre  
 meffiance, car ce que le meschant craint cela mesme  
 luy aduient. Ne nous laissons donc pas piper par tels  
 menteurs, & que leurs faux rapports n'admortissent  
 point nostre courage: ne les croyons point, enco-  
 res qu'ils disent verité, qui est le salaire de telle en-  
 geance sathanique. Ie ne scaurois excuser ceux qui  
 branslent à tels bruiets: que si nous auons espousé  
 la querelle de Dieu, & de l'Eglise, il ne faut plus re-  
 garder derriere, & escouter d'où vient le vent: il faut  
 faire vne sainte, & braue resolution, & dire avec le  
 psalmiste. *Mihi autem adhaerere deo bonum est, ponere in*  
*eum spem meam*, fcent les autres ce qu'ils voudrōt,  
 quant à moy, c'est tout mon bien, adherer a mon  
 Dieu, & mettre en luy mon esperance. Or tout ainsi  
 que ceux desquels nous venons paler se laissent em-  
 porter par le vent d'un faux bruiet, gens irresolus  
 & incertains: aussi en y a il d'autres chatouilleux, di-  
 fficils, chagrins, ombrageus, intractables, qui so-

fencent de tout malicieusement curieux, qui regar-  
 dent plustost tousiours sur autrui, que sur eux-mes-  
 mes, & ne cerchans qu'occasion de se desbander,  
 crient contre les mauuais prelatz: ie suis contrainct  
 à mon grand regret confesser que quelqu'vns sont  
 plustost loups, que pasteurs: & pouuons bien dire  
 avec Dauid: *Posuisti tribulationes in dorso nostro, imposui-  
 sti homines super capita nostra*: Mais nostre Seigneur  
 nous aduertit que nous nous baillons garde des  
 faux prophetes, des desguisez, des Scribes & Phari-  
 siens qui seront assis sur la chaire de Moyse: & par-  
 tant iettez l'œil sur les bons, qui sont la plus grand  
 part, car d'octante ou enuiron qui sont en ce Royau-  
 me ne s'en treuuent que sept ou huit qui tiennent  
 le party du tyrā, & ne faictes pas cōme les mouches,  
 lesquelles s'adressent tousiours aux playes, & vlce-  
 res. Vous baillez biē à cognoistre que vous y proce-  
 dez du mal-talent, car autrement vous seriez tou-  
 chez d'vne charitable compassion, & pour hayne  
 d'eux, vous ne vous rendriez pas pires, ne sçauiez  
 vous point que le diable se fourre par tout, & que  
 mesme d'vne si sainte & petite cōpagnie qu'estoit  
 les douze Apostres de nostre Seigneur, il en a posse-  
 dé l'vn? & vous gens d'Eglise (ie parle aux meschans,  
 qui par leurs scādaleux desportemens, & mauuais  
 exemple despeuplent l'Eglise Catholique) pasteurs,  
 qui vous paisez vous mesme, prelatz courtisans,  
 qui ne chantez ne Messe, ny Matines, Pasteurs qui  
 ne tondez pas seulement, mais escorchez, & deuor-  
 rez vostre troupeau: chiens muets, qui ne sçauiez  
 aboyer, sinon contre l'Eglise: vipere qui creuez vo-  
 stre mere: pasteurs traistres, qui traictez paix avec le  
 loup rauissant, au dōmage & au prix du sang de vos



ouailles: vostre symonie, vostre auarice, vostre apostasie, vos chiens, vos cheuaux, les delicieuses desbauches d'vne court, ne vous baillét elles point vn moment de loisir pour penser à vous, pour considerer quel iugement vous attend, vous par la nōchalance desquels ceste pauure Eglise est tellement deschiree, la religion mise en opprobre, & tant d'ames perdues, desquelles vous estes responsables deuant Dieu, qui les a rachetees si cherement? Mais quant à nous, parquoy nous debuons nous damner par compagnie? ferôs nous si beau ieu au diable, q̄ de la damnatiō de nos mauuais pasteurs, nous prenions l'occasion de la nostre? Ia ne plaise à Dieu, qui ne nous a point laissé orphelins, ains nous en a laissé de bons sous lesquels nous nous deuons ranger, & n'estre plus si prompts desormais à nous offenser & scandalizer. Il y a d'autres Catholiques scrupuleux, qui nous greuent beaucoup, & retardent nos affaires: combien qu'ils soient aucunement excusables, veu que tels scrupules viennent d'vne conscience qui craint Dieu, mais non avec discretion en cecy. Descouurons ie vous prie, la ruse de l'ange des tenebres, qui a endurcy le cœur du tyran, & de ses adherans, les a tellement auéuglez qu'ils ont ozé enfreindre, & violer tout droict, courir leur trahison, sous vn serment si solemnel, par la sainte Eucharistye, assassiner vn Prince duquel en despit d'eux, ilz cognoissent la valeur & innocence, massacrer de sang froid, celluy qui estoit oint & sacré: & nous tout au contraire, il nous veut intimider, & mettre le ver à la conscience, afin que lachement nous conuiions à si detestable perfidie.

Il nous remet deuant les yeux, que nous qui sommes Chrestiens, deuous aymer nos ennemis: ce conseil seroit receuable, s'il n'y alloit que de nostre interest particulier, mais où il est question de l'honneur de Dieu, & de la religion, il n'y a ne Roy, ny roc, qui nous doie retenir: Bien est vray que ie serois d'aduis que nous nous comportassions plus humainement enuers luy (si Dieu nous baille le des-sus) qu'il n'a fait enuers les Princes meurtris, la personne de l'un desquels deuoit estre autant inuiolable, à cause de l'onction Pontificale, que scauroit estre la sienne propre, à cause de l'onction royale (si toutesfois il a esté oint, veu qu'à son sacre à reims, la sainte Ampolle se treuua tarie, signe tout appert de sa reprobatiō.) Il luy faudroit mitiger la rigueur de la loy qu'il a fait sentir aux autres, & le loger par fourriers en ses beaux hermitages, ou plustost cachots & trous qu'il a fait bastir en ce marché aux cheuaux, & au bois de Vincenne, vestiges de ses sortes fantasies: & luy bailler vne troisieme couronne, pour l'accomplissement de sa deuise, *Manet ultima caelo* (& par vne gentille rencontre) *Claustro*: au moins par ainsi il auroit loisir de recognoistre & pleurer sa faute, & se deliurer des pieges du diable, esquels il est encheu par son hipocrisie, & felonnie: & nous aussi, serions incouppables de son sang: qui est le trait de plus singuliere courtoisie & charité qu'il puisse ou doie esperer. Il est nostre roy, dites vous, il est l'Oint de Dieu: O combien vous le poignez au vis! c'est autant come si vous disiez, il est deffenseur de la religion, protecteur de la patrie, pere du peuple (car voila que c'est estre Roy, Roy de France)



& vous voyez comme il a sappé l'Eglise, fauorisé l'heretique, fait venir les estrangers en ce pauvre Royaulme, & demande si encores le paysant couche sur la plume. Si vous doutez qu'il soit heretique: ie vous renuoye aux effets, & à ce que vous en auez peu veoir en la contrecarre: tant seulement ie vous demanderay, les Huguenots douterét ils que la partye se dressast contre eux, quand l'Admiral & les aultres furent tuez a Paris? & nous doubterons nous si le tiran, & les siens en veulent a l'Eglise puis qu'ilz meurtrissét les chefz? Ie croy que no<sup>s</sup> sommes tous charmez. He-bien cela vous semble dur, de demettre vn Roy, luy oster la couronne: pourquoy? puis qu'il viole le sermēt fait en son sacre, pource qu'il destruit l'Eglise, puis que luy nous a deliuré du serment de fidelité, s'il violoit sa Foy puis qu'il se rend indigne de telle maiesté? ceux qui ont moins offécé Dieu, l'Eglise & le peuple en ont ilz eu meilleur marché? comme vn Childericq, vn Chilpericq & de nostre temps Dalbret Roy de Nauarre? Vn Roy est il plus enuers sō peuple, qu'un Pere enuers ses enfans? or vous sçauiez qu'à vn mauuais mesnager, qui rudoye, & malmeine ses enfans, & dissipe leur substance, on ordonne vn curateur, & est tel pere honteusement priué de toute administration, c'est contre mon gré, que ie fais la mesme conclusion contre celuy qui a esté nostre Roy: mais i'aymé trop la religiō, & la patrie pour dissimuler en cest endroit: & diray d'auantage, que d'autant qu'un bon Roy est à aymer, & honorer, quād il exerce bien la Iustice, & police sainctement son Royaulme, aultant est il a hayr, blasmer, & pour-

fuiure, quand il faißt au cōtraire. Vous voyez donc  
 tout clairemēt, cōme ce scrupul de quelques gens  
 Catholiques, qui seignēt du nez, & font difficulté  
 de s'armer contre le tyran est insinué en leur con-  
 science, par l'artifice du diable enragé de voir ses  
 supots chassiez & poursuiuiz, & la religion, avec la  
 Iustice restablie, pēseriez vous que luy, qui est bou-  
 tefeü, & seme-noise, nous coruast la paix, s'il ne co-  
 gnoissoit qu'une guerre si sainte, bataille directe-  
 ment contre luy? serons nous donc encores scrup-  
 puleux de nous armer pour la cause de Dieu? de-  
 meururons nous encore irresolus, apres la determi-  
 nation, & decret de la sainte faculté de theologie  
 à Paris, de laquelle, pour ce faißt, sont conuenuz  
 septante Docteurs, tous d'un mesme aduis: apres  
 l'aduis du saint pere, apres le commun consente-  
 ment de toutes les communantez, de tous les reli-  
 gieux & gens de cōscience, apres l'vñion & asso-  
 ciation des parlementz & villes principales de ce  
 royaume, nous sommes si hardis à mal faire, & si  
 morfonduz a bien, le commandement de Dieu, le  
 texte expres de l'escripture sainte, l'aduis des pre-  
 lats, & docteurs de l'Eglise, ne nous peuuent ra-  
 mener au debuoir: & tout au rebours de nostre pro-  
 pre motif, nous nous licencions à toute meschan-  
 ceté: S'il n'y auoit deffaut de foy, ou quelque chose  
 pire, si tost que nous auons descouuert tout à iour,  
 que nostre tyran en vouloit à la religion, comme  
 nous nous en doutions long temps y a, nous luy  
 eussions couru sus: qui a esté, comme ie croy, la re-  
 solution premierement loge au cœur de tous les  
 bons & vrayz Catholiques. Je me plaindray icy  
 prenant

prenant ces propos en saint Iehan chap. 12. *Multi crediderunt in eum, sed propter Phariseos non confitebantur eum, dilexerunt enim magis gloriam hominum, quam Dei.* (ces propos s'entendent de Iesus Christ, aussi est il question aujourdhuy de Iesus Christ, en la personne de son espouse l'Eglise: plusieurs ont creu en luy, mais à cause des Pharisiens ils ne le confessoient point: car ils ont plus aymé la gloire des hommes, que Dieu. Voila où nous en sommes: voila nostre foy, foy morte, qui s'esuanouit par le vent du cabinet d'un Roy, comme on parle aujourdhuy, & si Dieu eternal n'y eust mis la main, nous n'auions tantost plus qu'un Dieu mortel: ouy n'est ce point recognoistre pour Dieu, dire, ie suis vostre facteur, ie suis vostre creature: qui est facteur & createur, n'est il pas Dieu? & puis ces mots, sacree maiesté, ainsi nous plaist, & autres semblables n'appartiennent elles point à Dieu seul? veritablemēt ie me suis quelquefois esmerueillé: comment telle personne n'entroit en vne plus intollerable arrogance, & fierté, veu les louāges, & deuises qu'on luy attribuoit, comme ceste deuise susdite *Mars ultima celo*, & puis, Mars en son front, Mercure en sa bouche, l'Amour en ses yeux, & le puis triōphe à sa rentree apres la deffaidte des reistres par Monseigneur feu le Duc de Guyse. J'ay aussi quelquefois pensé à ceste belle institution des cheualiers du saint Esprit, & contemplé vn tableau, qui est au dessus du maistre autel des Augustins à Paris, dans lequel n'y a depeint ny Crucifix, ny vierge Marie, ny saint quelconque, ains le papelart est la intronisé, les cheualiers à genoux, & le saint Esprit au dessus, mais es Eglises des Chre-



tiens, ie ne vis oncques le saint esprit despeint, sans les autres personnes de la sainte Trinité, ou sans la benoïste Vierge, ou quelqu'un des saints: que restoit-il plus sinon qu'on luy presentast de l'encens? O abus intolerable! mais il peut maintenant bien dire comme Alexandre le grand, lequel combien qu'il fust charmé par tels flatteurs courtisans, qui l'appelloient Dieu, ayant receu vn coup de fleche dans la cuisse, sceut bien dire, tout Dieu qu'il estoit, que la playe luy cuisoit, & causoit grand douleur: & si nostre tyran regarde à quoy il est reduict, comme ainsi est que les trauerses esueillent l'esprit, fil n'est dutout reprouué, il recognoistra bien que ses mignons, & courtisans flatteurs, l'auront tantost mis en chausses, & en pourpoint: & les fauces honneurs, qui l'ont amené à telle oubliance de soy, luy mettront le ver en la conscience si auant, qu'il cognoistra qu'il estoit indigne d'eux: qu'il a esté roy, non pour ses merites, mais pour nos demerites: comme a esté autresfois reproché à Phocas meschant Empereur, & comme Dieu a coustume de chastier son peuple, luy baillant vn roy en sa fureur, vn roy ieune, vn roy hypocrite: helas combien auons nous senty tel iuste iugement en nostre tyran, le plus grand hipocrite qui fut oncques, qui s'est tât deguise & masqué, tâtost en habit blâc, main tenât gris, ors rouge, & tâtis en sa court il n'y auoit que villenie & desbauches: il faisoit le moine, tandis que les Allemans rauageoient ce pauvre Roy-aume: il n'estoit chargé que de chapelets, *Agnus Dei*, & de croix, & tandis meschamment il trahisoit l'Eglise: il faisoit des edicts à l'aduantage des Ca-

tholiques, mais au faire, il fauorisoit l'heretique: & pour derniere main de son hipocrisie, vous sçauiez, ce qu'il a fait ces iours passez à Blois execrable hipocrisie, hipocrisie peché seruil, indigne d'un Roy, qui iamais n'a trouué place qu'en vne ame couarde, & poltrone: peché maudit de Dieu, adiugé au feu d'enfer, au lieu de tenebres, & de grinsement de dents: hipocrisie, comme dit fort bien vn autheur moderne, est vn mal subtil, vn venin bien secret, vn poison bien caché, vn fard & desguisement de vertu, teigne de sainteté, qui scait mentir pour se faire croire, qui esgorge la vertu par son propre glaue: le ieusne, par le ieusne: par feinte misericorde, & pieté, abat la misericorde & pieté: par oraison simulee se mocque de la sainteté, semblable à la fleur, quand par vn froid hanap, elle verse au corps l'ardeur, & chaleur cuisante: c'est ceste hipocrisie par laquelle l'Eglise de Dieu doit estre tant affligée & tourmentée, comme nous aduertit saint Paul à Thimotee chap. 4. & vous voyez comment nostre hypocrite y a besongné, dont nous pouuons dire de luy comme de Iulian l'Apostat, qu'il a plus endommagé l'Eglise de Dieu par son hipocrisie, que Neron par sa violence & persecution: & ce que respondit Alexandre à quelqu'un, qui louoiet Antipater de quelques legeres & apparetes vertus: ie treuve mauuais dit il, que Antipater en son cabinet est vestu de pourpre, mais quand il va dehors, il se vest de blanc, c'estoit vn tel hypocrite que le nostre, qui par beau-semblant, & dissimulation attire les Princes en son cabinet, empourpré de sang pour les y assassiner. Je desirerois qu'il entendit l'hi-

stoire d'un nommé Anthoine Picentin, moine de  
 l'ordre des hermites de saint Augustin, la compa-  
 raison ne doit pas estre odieuse veu qu'il a plus fait  
 le Moine que le Roy, qui fut diuinement puny de  
 son hipocrisie, & des blasphemes qu'il vomissoit  
 contre la vierge Marie: la langue luy tomba ron-  
 gée de vers, & son corps deuint pire que ladre,  
 mourant en angoisses, & tourmens incroyables:  
 par ce qu'il auoit deuant le monde tousiours por-  
 té l'habit de sainteté, & acquis bon bruit, conuer-  
 sant honnestement, & menant vne vie en apparen-  
 ce irreprehensible. Ce que entendant Alphonse  
 roy d'Aragon, loua hautement Dieu, qui manifeste  
 ses iugemens tant à point, pour retirer le monde de  
 son impieté, & dit fort bien à propos, que Dieu a-  
 uoit eu son tour & sa reuange, à cause que ce moi-  
 ne l'auoit fait seruir de valet, en ce qu'il auoit em-  
 prunté le nō de sainteté, pour masquer son im-  
 pieté: & que c'estoit la raison qu'il se monstraist le  
 maistre en le chastiant, afin de monstrier aux au-  
 tres, le danger où ils se fourrent, quand ils se ren-  
 dent hypocrites, quenostre tyran, n'en attende  
 pas moins, s'il ne se recognoist bien tost, mais il en  
 est bien arriere veu qu'au contraire il menace les  
 bōs Catholiques & elpere se baigner en leur sang,  
 & quand à nous recognoissons nous aussi, afin que  
 Dieu nous deliure de luy, & que nostre religiō Ca-  
 tholique puisse resflorir ce qu'encores que n'aduiē-  
 ne si tost, contenons nous toutesfois es bornes de  
 la crainte de Dieu: *Quis enim nouit potestatem ira tua,*  
*et praetimore tuo, iram tuam dinumerare?* comme s'escrie  
 David, que s'il nous semble qu'il tarde ceste nostre



impatience, veu qu'il est prest à tous ceux qui l'inuoquent, qui l'inuoquent en verité: il viendra & ne tardera point, *Viriliter agite, & sustinete dominum*, autrement nous comettons le mesme blaspheme, que les Iuifs, qui donnoiēt du nez, & d'un hoche-teste à nostre Seigneur pendant en la croix, lors qu'ils disoient ha toy qui desmolis, & reedifies le temple en trois iours, sauue toy: qui garentis les autres, deliure toy. *Improprium ipsorum quod improbrauerunt tibi domine?* presterons nous si peu de creance aux promesses de nostre Dieu, que nous auons si expresse? doubterons nous de sa puissance & misericorde, pour conseruer son Eglise, qui luy couste si cher: iusques à ceste heure aurons nous eu vne Foy incertaine, vne foy en l'air, vne foy chimerique? que si nous nous desbandons auourd'huy, fault il pas que nous passions condamnation pour toute nostre vie passé? que confessions impies & superstitieuses tous les exercices de nostre religion? que nous detestions, & exercions ce que nous auons honoré, & adoré! que nous congnoissions pour maîtres, & correcteurs, ceux que nous auons autres-fois poursuiuy à outrance, & hay à mort: hé de quel œil pourrons nous regarder noz peres & meres, noz Docteurs & religieux? que dirons nous de nos temples: à quelle honte, & confusion, ne tourneroit le zele, duquel autrefois nous auons esté transportez? que si ayant mis en auant, quelque petite proposition vn peu mal fondée en nos deuis communs, nous la soustenons opiniastrement & nous hontoions de nous desdire: quelle honte, ou plustost quelle impieté sera-ce, nous


messier de nostre Dieu, desauouer tant de sainctes  
 concils, condamner les peres & docteurs de l'Egli-  
 se, desmentir & toute l'antiquité, & nous mesmes?  
 helas tant de ieunes, tant d'obseruances aux com-  
 mandemens ecclesiastiques, tant de sainctes cere-  
 monies, tât de larmes & souspirs de charité, tât d'a-  
 ctes de penitence, nous seroient-ils matiere de  
 penitence & contrition? nostre foy du tresau-  
 guste Sacrement seroit elle vne idolatrerie? & vous  
 (seigneur) auriez vous permis vn tel & si long a-  
 bus? Je diray avec Hugues de saint Victor, puis-  
 que nos preuaricateurs, & faux Catholiques m'im-  
 portent iniques à la, si nous auons failly, vous  
 nous auez abusé? Mais ia ne luy plaist, que nous  
 autres bons Catholiques venions à ces termes:  
 ains la persecution, nous apportera plustost la gloi-  
 re du martyre: La tribulation nous ouurira le che-  
 min de Paradis: La verge de Dieu sera pour nostre  
 correction, non perdition. Nous scauons bien  
 que nous n'auons pas vn Dieu Epicurien, qui apres  
 nous estre souille & veautrez en toutes sortes de  
 voluptés brutales, apres auoir laschemēt preuari-  
 qué de sa sainte loy, nous loge en Paradis chauffez  
 & vestuz: nous auons telle confiance en Dieu, & si  
 bien succé le lait de nostre mere l'Eglise, que quel-  
 ques maulx que nous endurions, nous nous repu-  
 terons dignes de plus grands: & quelque bien qu'il  
 nous enuoye, nous l'estimerons misericordieux  
 pour nous en enuoyer de plus grâds, & quoy qu'il  
 aduienne, nous ne nous esbranlerons point: qui  
 feroit autrement, ne seroit point vray Catholique,  
 car varier selon les occurrences & prendre party





selō le succes, & reuolutiō, ce n'est point Foy chrestienne, ains vne prudence humaine : ce n'est point croire à Dieu, ains à soy mesme : & toutesfois ce mal est si cōmun auourd'hui, qu'en toutes noz affaires, nous iettons tousiours plustost l'œil, sur toutes autres choses, que sur nostre Dieu & Createur. Desormais il faut changer de poil, & sainctement embrasser la cause de Dieu, & de son Eglise : d'autant plus, que plus elle est persecutée en ce regne de l'antechrist, & en ces derniers temps (comme les cōiectures y sont apparentes) ou quand nostre seigneur viendra, il ne trouuera plus de Foy en terre c'est adire, bien peu : parole aultant espouuanteable, comme vraye, & expresse en l'escripture sacree : De laquelle l'apprehensiō nous doit auourd'hui ambrazer du zel, & de l'amour de Dieu, & de l'Eglise Catholique : nous encourager contre les hereticques, & contre nostre tyran : & tous nous induire a mespriser (en cas de religion ] parens, amys, biens, & aultres commoditez temporelles : affin que nous puissions estre de ce petit nombre de vrais Catholiques, esquelz nostre Sauueur trouuera la Foy, quand il viendra pour nous iuger : & qu'ainsi nous face heritiers de la vie eternelle. Ainsi soit-il.

P. M.

























No 2.  
Nov. 9. 11. 13.  
385

Case

F

39

. 526

1589 by

